

# Premios Luis Tilve 2015

- **Traballo Digno**
- **Defensa do medio ambiente e dos bens comúns**
- **Acción Solidaria**
- **Investigación e Divulgación Histórica**

O pasado día 16 de xuño de 2015 o Padroado da Fundación Luis Tilve acordou convocar os "Premios Luis Tilve 2015", na que será a décima edición dos Premios na súa modalidade actual. Os contidos e bases da convocatoria son os seguintes:

A Fundación convoca os **PREMIOS LUIS TILVE 2015** conforme ás consideracións, contidos e bases que se indican a continuación:

## Consideracións Xerais:

Os premios serán catro, denominados: "TRABALLO DIGNO", "ACCIÓN SOLIDARIA", "DEFENSA DO MEDIO AMBIENTE E DOS BENS COMÚNS" e "INVESTIGACIÓN E DIVULGACIÓN HISTÓRICA". Irán destinados a persoas, asociacións ou entidades que merezan ver destacado o seu traballo e premiada a súa labor, como exemplo e factor de estímulo positivo diante da comunidade galega, en relación ós valores que se pretende impulsar.

O Xurado, está presidido por **Fernando González Laxe**, Catedrático da Universidade de A Coruña e Presidente de Honor da Fundación, e integrado por: **Salvador Fernández Moreda**, Economista; **Álvaro Ansias Bacelar**, funcionario público, experto en temas sociolaborais; **Carmen Avendaño Otero**, Presidenta da Fundación Erguete-Integración; **Ana Romero Masiá**, Catedrática de Xeografía e Historia; **Tareixa Navaza González**, xornalista; **María Xosé Rodríguez Galdo**, Catedrática da Universidade de Santiago; **José Antonio Gómez Gómez**, Secretario Xeral da UGT de Galicia e **Roxelio Pérez Poza**, Secretario da Fundación Luis Tilve.

## Contidos:

### 1.- Premio "Traballo Digno"

Distinguirá e premiará aqueles actos e realizacións que constitúan unha referencia do que debe ser un traballo digno para todos, sen diferenzas de sexo, raza, nacionalidade, relixión, ou ideas políticas.

Neste senso cabe referirse a:

- Cuestións destacadas, conseguidas e consignadas en convenios colectivos ou pactos de empresa.
- Iniciativas de formación profesional que en calquera das súas modalidades (regrada, formación para o

emprego, etc.), destaquen como contribución a un traballo de calidade para persoas e colectivos e axuden de xeito singular á creación ou mantemento de postos de traballo, ou a unha significativa mellora das condicións de traballo.


- Iniciativas sindicais e empresariais que teñan servido para mellorar de xeito salientable a prevención de accidentes, así como as medidas de seguridade e hixiene no traballo.
- Actuacións, acordos e iniciativas para suprimir ou reducir substancialmente a contratación en precario e a eventualidade.
- Persoas que a través da súa actividade profesional teñan contribuído de xeito destacado ó fomento do emprego e dun traballo digno, tanto no ámbito da industria, do agro ou da pesca, como no campo da docencia ou doutras actividades profesionais, a través de artigos e traballos nos medios de comunicación, libros, reportaxes, ensaios ou doutros medios.
- Iniciativas que a través do traballo axuden a unha mellor integración social de persoas ou colectivos.
- Iniciativas que teñan contribuído de xeito notable á integración dos traballadores e traballadoras inmigrantes e ó recoñecemento e respecto dos seus dereitos.
- Iniciativas que creen emprego, particularmente a través de cooperativas e pequenas e medianas empresas, respectuosas co medio ambiente.

### 2.- Premio "Acción Solidaria"

A unión e a solidariedade son valores históricos do movemento sindical, que as sociedades democráticas teñen asumido como propios e que a Fundación Luis Tilve quere impulsar como un ben común fronte ó individualismo, ás actitudes discriminatorias, clasistas ou xenófobas.

As accións solidarias son característica dos grupos humanos que avanza e progresan. A auténtica solidariedade alimenta a convivencia xusta, o respecto político e a paz. É fundamental, con esta orientación, compartir a loita contra as inxustizas, as adversidades e as catástrofes, así como as súas causas.

Dende esta perspectiva distinguirase e premiarase calquera iniciativa que contribúa ó avance dos obxectivos mencionados. Singulamente e a modo de exemplo:



- As accións solidarias con traballadores e traballadoras en dificultades, con motivo de folgas, peches de empresas, despedimentos, sancións inxustas, etc.
- Accións concretas e eficaces de solidariedade internacional.
- Campañas e actividades concretas para combater as causas da pobreza, das enfermidades, da explotación dos seres humanos, da guerra, etc.
- Accións concretas de solidariedade coas vítimas de accións terroristas, ditaduras, mafias, abusos de todo tipo.
- Accións eficaces de solidariedade coas vítimas de catástrofes, accidentes ou situacións de necesidade.

Aos efectos anteriores, consideraranse accións solidarias, ademais de actos ou xestos concretos, á publicación de manifestos, declaracións, artigos de prensa, programas nos medios de comunicación, organización de actividades públicas de carácter cidadán, estudos, libros, etc.

### 3.- Premio “Defensa do medio ambiente e dos bens comúns”

A esixencia dunha actividade económica, produtiva e industrial respectuosa co medio ambiente é algo que se fai máis patente e xeneralizado cada día, tanto por parte dos traballadores e traballadoras como da cidadanía en xeral. É tamén unha demanda cara ó inmediato futuro. Neste senso o crecemento económico sostible é un referente estratéxico fundamental.

Ao falar de medio ambiente queremos referirnos a ese ben común, ben de todos, que non se debe converter en monopolio privado ou negocio de ninguén, como é a propia terra que habitamos: os ríos, a auga, o mar, o aire que respiramos, os bosques, a biodiversidade, os coñecementos humanos, a lingua e a cultura compartidas, as terras comunais, etc.

Tamén é importantísimo e necesario defender outros bens comúns, bens de todos, que tampouco poden converterse en particular negocio, e menos aínda monopolio. Referímonos a servizos públicos como a saúde, a educación, a seguridade social, os programas de asistencia social, a depuración e subministro de auga potable, a información, a seguridade colectiva, os ferrocarrís, os servizos postais, as cadeas, o transporte aéreo, os museos, as institucións culturais, os dereitos humanos, a atención ós maiores e ós nenos, etc.

Trátase igualmente de premiar aquelas iniciativas concretas encamiñadas a frear a ofensiva privatizadora dos bens públicos, que conduce a unha sociedade máis empobrecida, dualizada, coas liberdades minguadas e a propia democracia limitada e empequencida, ameazando ó estado moderno de impotencia para facer fronte ós problemas actuais.

As posibilidades de accións concretas e iniciativas a destacar e premiar son moi amplas e comprenden dende traballos periodísticos ate estudos rigorosos, traballos de profesionais, de alumnos, actividades culturais e de divulgación, así como tamén accións cívicas, incluídas mobilizacións e manifestacións sociais diversas, sempre pacíficas.

### 4.- Premio “Investigación e Divulgación Histórica”

Distinguirá e premiará os estudos, investigacións ou traballos de divulgación no eido das ciencias sociais, históricas e xurídicas, relativos ó mundo do traballo e da empresa, particularmente no referido ás relacións laborais, á historia das organizacións sociais, políticas e, singularmente, do sindicalismo e da súa problemática na sociedade actual, o cooperativismo, a emigración e inmigración e, en xeral, canto concirne ás condicións de vida e de traballo.

#### Bases:

1.- Poderán optar ós premios tódalas seccións sindicais, sindicatos comarcais, unións e federacións das organizacións sindicais democráticas con presenza en Galicia. Igualmente tódalas persoas a título individual, así como calquera asociación ou entidade legalmente establecida na nosa comunidade.

2.- Poderán facer propostas tódalas persoas físicas, inclusive os membros do Xurado a título individual, así como calquera asociación, organización ou entidade legalmente establecida en Galicia.

3.- As propostas presentaranse por escrito, dirixidas a:

#### “Premios Luís Tilve 2015”.

Avda. Cruceiro da Coruña, nº 22, baixo.  
15705 - Santiago de Compostela.  
Tlf: 981 58 54 90  
E-mail: fluiartilve@hotmail.com  
<http://www.fundacionluistilve.com>

Facendo constar:

- Nome, enderezo e teléfono da persoa ou entidade proponente ou, no seu caso, nome e datos de identificación da persoa ou entidade proposta.
- Premio ó que se opta ou ó que se postula.
- Informe dos feitos que motivan a proposta. (Ditos feitos non poderán ser anteriores ao 1 de setembro do ano 2013).

4.- A data límite para a presentación de propostas será o día **15 de setembro do ano 2015**.

5.- Os premios consisten nunha figura en bronce de dúas mans entrelazadas, obra exclusiva do artista César Lombera e, no seu caso, a publicación do traballo premiado.

6.- A entrega dos premios realizarase nun acto público que terá lugar, segundo o previsto, en decembro do 2015, no lugar e día que determine o Xurado.



Galardón elaborado por Cesar Lombera